

Is Surat Ni Epustul Pablo Ziyà Te Menge TigGelasya

Is Mehitenged te Surat he Para te Menge TigGelasya

Nepauk si Pablo su nezing din he midsuwayan te menge tumutuu ziyà te prubinsya he Gelasya is impenurù din kandan. Hein aney medwali si Pablo ziyà te kandan te kenà menge Hudiyu, nengelipey sikandan te kedawat kandin ne iyan impenurù din kandan is: iyan igkezewata te Megbevayà te etew is pinaagi te kedtuu zin ki Jesu Kristu. Iyan, hein mid-awè en si Pablo ziyà te kandan ne zuen menge Hudiyu he midsulisul kandin. Ne iyan kandan he penurù is: kinahanglan he edtumanen te etew is langun duen te kesuguan wey tulumanen te menge Hudiyu su wey sikandin mezawat te Megbevayà.

Ne tenged kayi segugunà sikandan mibpesurati ni Pablo te kedsawey kandan. Ke sikandin te, “Emun edsunuzen niw heini is penurù dan ne kenà ebpulus si Kristu ziyà te keniyu!”

Ne zuen daan menge etew ziyà te Gelasya he egkagi te kenà tutuu he epustul si Pablo su wazà sikandin mekepekiduma ki Jesus hein dini pa si Jesus te kelibutan. Iyan, midtavak heini ni Pablo pinaagi te kegkagi he mibpeehè kandin si Jesus hein diyà sikandin te zalan pehendiyà te Demasku. Wey elin daan nekagi zin he midawat te menge epustul ziyà te Hiruselim is kandin he kegkeepustul. Egkeserigan is nekagi zin su iyan is Megbevayà mibegey kandin te kegehew wey iyan edumala kandin.

Impesavut ni Pablo he is menge etew he ebpevayàbayà te mezaat he kebaya te lawa zan ne egkeveelan dan is langun he mezaat. Umbe utew ta kinahanglan is layun kebpezumala te Wagas he Mulin-ulin. Pinaagi kayi egkehimu ta te ebmahal is Megbevayà wey is menge etew wey zuen ta meupiya, melinawen wey melipayen he ked-ubpà.

1 1,2 Siak si Pablo is midsurat kayi. Ibpeuwit ku heini ziyàn te keniyu te langun he menge tumutuu ziyàn te menge inged te tivuuk he prubinsya he Gelasya. Siak wey is langun he menge tumutuu he menge

zuma ku zini, ebpengemusta keniyu. Epustul a, iyan, wazà a gerari he epustul te etew zà duen, ne kenà daan pinaagi te etew zà duen is kedsugua kedì, kekenà, migeraran a he epustul ni Jesu Kristu wey te Amey tew he Megbevayà he mibanhew ki Jesus, ne iyan sikandan midsugù kedì.

³Berakat he ikegagew kew te Amey tew he Megbevayà wey te Nengazen tew he si Jesus wey vegayi kew zan te melinawen he kebpekesavuk.

⁴Si Kristu, imbelavag din is untung din su wey mepalis is minge salè tew su wey kiw melibri, ne kenè tew meiringi is minge etew he ed-ulaula te mezaat te guntaan he timpu kayi te kelibutan. Umba mibeelan heini ni Kristu su edtumanen din is egkesuatan te Amey tew he Megbevayà.

⁵Berakat he zeliga is Megbevayà te wazà pidtemanan.

Sebsevaha Zà is Meupiya he Tudtulanen

⁶Uteu ku sikiyu igkeinuinu su wazè en uteu meugèt ne henduen be te nahalin en is kedtuu niw, ne is Megbevayà he iyan mibpetuu keniyu pinaagi te gagew ni Kristu, ed-iniyugan niw ne edtuuwan niw is selakew he tuluuwen he egngезanan daan te minge etew he Meupiya he Tudtulanen. ⁷Iyan, kenà egkehimu he zuen selakew pa he tuluuwen he egngезanan te Meupiya he Tudtulanen. Egkegiyen ku heini su zuen minge etew ziyàn he ebpenurù te tarù, ne pinaagi kayi egkesemukan is isip niw su edhelinen dan te tarù is Meupiya he Tudtulanen mehitenged ki Kristu. ⁸Iyan, egkegiyen ku keniyu he ke zuen minsan hentei, minsan ke sikami, wey minsan ke velinsuguen he ebpuun te langit, ne zuen ibpesavut din keniyu he egkegiyen din he Meupiya he Tudtulanen, iyan, selakew, ne kenà iyan heini is tutuu he tuluuwen he impesavut dey keniyu, ne verakat he meimpirnu sikandin. ⁹Daan dey en keniyu heini migkagi, iyan, ed-umanan ku egkegiya guntaan he ke zuen ibpesavut te minsan hentei he egkegiyen din he Meupiya he Tudtulanen, iyan, kenà iyan is tutuu he tuluuwen he impesavut dey keniyu, ne verakat he meimpirnu sikandin.

¹⁰Kunaan niw vuwa ke iyan netagù te gehinawa ku is: egkesuat a he zeliga a te minge etew. Iyan, kenà iyan heini netagù te gehinawa ku, kekenà, iyan is kebpenunuata ku te Megbevayà. Kunaan niw vuwa zaan ke egkesuatan ku he ibmeupiya te gehinawa te minge etew is minge ulaula ku, iyan, kenà daan iyan egkesuatan ku su emun iyan egkesuatan ku, kenà egkehimu he suluguen a ni Kristu.

Is Kegkeepustul ni Pablo

¹¹Egkesuatan ku, minge suled, he mesavut niw he heini is migngезanan he Meupiya he Tudtulanen he impesavut ku keniyu ne kenà

ebpuun te etew zà duen ¹²su wazà kegiya kediey te minsan hentei he etew ne wazà daan ipenurù kediey te etew, kekenà, impinted kediey ni Jesu Kristu.

¹³Nezineg niw is daan he minge ulaula ku zengan te kemulu ku pa kebenteyani te tuluuwen te minge zuma ku he Hudiyu. Is langun he minge tumutuu ki Jesus, mibpesipelahan ku su ebpegesen ku pezem sikandan he meengkezi zan is kedtuu zan. ¹⁴Is minge zuma ku he minge Hudiyu he serenganè ku te penuigen, wazà nekerepeng kedì te kebenteyani ku te minge tuluuwen dey te minge Hudiyu. Ne wazà kandan kedì nekerepeng te kebenteyani te imbilinbilin he minge vetasan te ginepuan dey.

¹⁵Ne minsan pa zutun, ingkegagew a te Megbevayà ne mibpili e zin he suluguen din te wazè e pa ianak ne nehimu zin he meketuu a kandin. ¹⁶Ne hein neisip dìn he ibpekilala zin en kediey is Anak din he si Jesus su wey ku ikepenudtul is keagi ni Jesus diyà te minge etew he kenà minge Hudiyu, wazà a mebpepenurù te minsan hentei he etew; ¹⁷ne wazà a zaan medhendiyà te inged he Hiruselim su wey ku mesampit kes nengehuna he epustul ni Jesu Kristu, kekenà, midhendiyà a te prubinsya he Erabya ne zutun, midlikù a ziyà te inged he Demasku. ¹⁸Ne tetelu pa zutun he tuig ne human a medhendiyà te inged he Hiruselim wey a mekepenumbaley ziyà te ki Pedro ne ziyà a te kandin taman dà te zezuwa he simana. ¹⁹Ne neehè ku zaan dutun si Santiago, sikan is hazi te Nengazen tew he si Jesus, ne wazà дума he epustul he neehè ku zutun, iyan dà sikandan is dezuwa.

²⁰Tutuu heini is edtudtulen ku keniyu. Netuenan te Megbevayà he kenà tarù.

²¹Ne zutun mibeyaan ku is prubinsya he Sirya wey Silisya. ²²Ne wazè e pa zutun mekilala te minge gurupu te minge tumutuu ki Jesus he ziyà te prubinsya he Hudiya. ²³Netudtulan dà sikandan te minge etew he siak is ebpendakep te minge tumutuu ki Jesus dutun te nengehuna he andew, ne guntaan idsangyew ku en is tinuuwan he iyan ibpendekepa ku kandan su wey zan meewai. ²⁴Ne tenged dutun midalig dan is Megbevayà tenged te neketuu a ki Jesus.

Is Ked-uyun ni Pablo wey te Zuma he Menge Epustul

2 ¹Ne sepulù wey heepat pa he tuig dutun ne human a medlikù diyà te Hiruselim. Mibpezumehè key ki Bernabe ne miduma ku zaan si Tito. ²Umba midhendiyà a su impinted kedì te Megbevayà haazà is kedhendiyè ku. Ne kebpekeuma zey zutun ne midtigum is minge egalen te minge tumutuu he iyan dan dà ne impesavut ku kandan ke hengkey is Meupiya he Tudtulanen he ibpenurù ku ziyà te minge etew he kenà minge Hudiyu. Egkesuatan ku zutun he kenà maawà is pulus te

nengeveelan ku en wey is kemulu ku pa ebeeli. ³Iyan, nesuatan dan ded is baal ku su si Tito, is duma ku, minsan te kenà sikandin Hudiyu, wazè dan itegel is kedsirkunsidar kandin sumalà is insugù ni Moises. ⁴Iyan, duen minge etew he kenà tutuu he minge tumutuu te tutuu he tuluuwen he midtampu kenami. Egkesuatan dan dutun he sirkunsidara si Tito. Umba midtampu zan he id-eles dan he kenè dan tutuu he tumutuu su wey zan maahà ke edtumanen tew is minge sugù he imbilinbilin ni Moises. Su egkesuatan dan he meiring kiw te uripen pinaagi te kedtuman te kesuguan minsan te nelibri kiw en ni Jesu Kristu ne wazè en kinahanglan he ebenteyanan tew pa is kesuguan. ⁵Ne wazè dey itugut he meveyveyai key zan te minsan hengkey he paagi su wey kenà meumani te tarù is tutuu he Meupiya he Tudtulanen, ne kenà egkezeetan is kedtuu niw.

^{6,7}Ne zutun, minsan sikan is minge etew ziyà te Hiruselim he henduen be te minge egalen te tumutuu, wazè dan ingkepenurù kediey he idheget te ibpenurù ku. Umba egkegiyen ku he henduen dan te minge egalen su wazà bali ziyà te Megbevayà te igerar kenita te minge etew. Wazà id-uman dan te kediey he ibpenurù, kekenà, nesavut dan dutun he insarig kediey te Megbevayà is kedsengyawa te Meupiya he Tudtulanen diyà te minge etew he kenà Hudiyu iring te insarig din daan ki Pedro is kedsengyawa kayi ziyà te minge Hudiyu. ⁸Su is Megbevayà, mid-ulinan din si Pedro wey mehimu sikandin he epustul he iyan ebpenudtul ziyà te minge Hudiyu, ne iring din ded, mid-ulinan e zin daan wey a mehimu he epustul he iyan sugù din diyà te minge etew he kenà minge Hudiyu. ⁹Ne si Santiago, si Pedro, wey si Juan, haazà is minge egalen dutun, hein nesavut dan he insarig kediey te Megbevayà heini is baal ku, mibpekigkumusta zan kenami ki Bernabe he tuus te teltelezuma key pudu is edtuman te ebpeveelan te Megbevayà. Neuyunan dey he iyan key ebpenudtul ziyà te minge etew he kenà Hudiyu ne iyan dan ebpenudtul ziyà te minge Hudiyu. ¹⁰Iyan dan dà intelaan kenami is kedtevangi zey te minge tumutuu he egkengeayuyu ziyà te Hiruselim, iyan, daan ku en heini midheget dini te gehinawa ku.

Is Kedewaya ni Pablo ki Pedro

^{11,12}Ne malù pa neuget dutun nekeuma si Pedro ziyà te kenami, te ziyè key te inged he Entiyukya. Ne hein aney sikandin mekeuma, hustu is mid-ulaula zin su mid-amur he egkaan te minge tumutuu he kenà minge Hudiyu. Iyan, hein nekeuma is minge tumutuu he Hudiyu he midsugù ni Santiago, midlikayan din he mekekaan duma te kenà minge Hudiyu. Ne midsawey ku sikandin su utew keladu he kenà hustu is ed-ul-ulahan din. Umba midlikayan din su nahandek sikandin su kela ke ikesewayi kandin haazà is ulaula zin dutun te minge tumutuu he Hudiyu he egkagi he kinahanglan he ebpesirkunsidar is minge tumutuu he kenà minge

Hudiyu. ¹³Ne iring din ded daan dutun is mid-ulaula te zuma he minge tumutuu he Hudiyu su midlikey zan daan, ne minsan si Bernabe, ne neuwit daan dutun. ¹⁴Ne hein nesavut ku he ed-ul-ulahan dan is supak te tutuu he impenurù te Meupiya he Tudtulanen, migkegiyan ku si Pedro ziyà te etuvangan te langun kandan, ke siak te, “Sikew, Pedro, sikan is minge tumutuu he kenè tew zuma he Hudiyu, maan is ibpetuman nu kandan is kesuguan tew te minge Hudiyu? Su minsan Hudiyu ka, mid-engkezan nu en is kedtumana nu kayi he kesuguan,” ke siak.

¹⁵Ne impelaus ku haazà is lalag ku te, “Sikita is etew he in-anak he Hudiyu, ne kenè ki iring te minge etew he kenà Hudiyu he egngezanan ta he ‘minge mesinupaken’. ¹⁶Ne minsan pa zutun, netuenan ta he kenè ki egkeisip he metazeng te Megbevayà pinaagi te kedtumana ta te kesuguan he imbilinbilin ni Moises, kekenà, pinaagi zà te kedsarig ta ki Jesu Kristu. Sikita is Hudiyu, nekesarig ki zaan ki Jesu Kristu su wey pinaagi te kedtuu ki Jesu Kristu meisip ki zaan te Megbevayà he metazeng. Netuenan ta he kenà heini egkehimu pinaagi te kedtumana te kesuguan. Su wazà minsan hentei he ed-isipen he metazeng te Megbevayà tenged te kedtumana zin te kesuguan. ¹⁷Guntaan, egkesuatan ta he isipa ki te Megbevayà he metazeng pinaagi ki Kristu. Ne pinaagi te kedtuu ta kandin ibpesavut kenita he mesinupaken ki ves daan he iring te kenà minge Hudiyu. Ne emun iyan heini, ne sikita is Hudiyu, egkehimu ve he ebpekekagi ki he pinaagi ki Kristu nehimu ki en he mesinupaken? Kenà daan egkehimu! ¹⁸Su emun edlikuan ku ne egkegiyen ku he hustu he paagi haazà is kesuguan he mid-engkezan ku, igkepeehè ku pinaagi kayi he venar iyan he mekesesalà a su nesupak ku is kesuguan. ¹⁹Siak, nesavut ku en he kenà a egkevegayan te untung he wazè din pidtemanan pinaagi te kedtumana ku te kesuguan, ne tenged dutun mid-engkezan ku is kedsarig ku te kedtumana ku te kesuguan su wey ku iyan metuman is minge sugù te Megbevayà. ²⁰Tenged te kedsarig ku ki Kristu, inransang a te krus дума kandin su elili ku sikandin. Minatey a, iyan, uuyag a gihapun su zini ed-ubpà te kediey si Kristu ne heini is kebpengungubpaan ku zini te kelibutan, pinaagi zà te kedsarig ku kandin te Anak te Megbevayà. Mahal a ziyà te gehinawa zin ne mibpehimatey sikandin he elili kediey su wey a melibri. ²¹Kenà egkehimu he kenè ku edewaten is gagew te Megbevayà kedì su ke egkehimu he ed-isipen ki zin he metazeng pinaagi te kedtumana ta te kesuguan, wazè bes pulus te kebphehimatey ni Kristu!”

Is Kedtuu wey Sikan is Kesuguan

3 ¹Sikiyu is minge tigGelasya, henduen be te kenè kew metau he ed-isip-isip! Utew a egkeinuinu keniyu! Maan is ebpemingegen niw is minge etew he ebpetuman keniyu te kesuguan he imbilinbilin

ni Moises? Utew keladu is kebpenurua ku keniyu te nehimu ni Jesu Kristu kenitew pinaagi te kebpatay zin diyà te krus. ²Duen id-insè ku keniyu. Hengkey is paagi te kegkezewata niw te Wagas he Mulin-ulin? Nezawat niw ve is Wagas he Mulin-ulin tenged te kedtumana niw te kesuguan he imbilinbilin ni Moises? Wazà, su netuenan niw he imbegey keniyu te Megbevayà is Wagas he Mulin-ulin tenged dà te nezing niw ne midtuuwan niw is tudtul mehitged te nehimu ni Jesus. ³Menge tulebung kew ves! Dutun te aney niw en kedsundan ki Jesus, midserigan niw is kedtavang te Wagas he Mulin-ulin, iyan, guntaan, kunaan niw vuwa ke egkepurungan is kedsundan niw pinaagi te keniyu za he ketau! ⁴Wazè bes pulus te menge meupiya he tuvad keniyu tenged te kebpeketuu niw! Kenà egkehimu he wazà pulus. ⁵Is Megbevayà, hein imbegey zin keniyu is Wagas he Mulin-ulin ne impeehè din diyan te keniyu is menge egkein-inuwan, wazè din iyan iveeli zutun is tenged te edtumanen niw is kesuguan, kekenà, tenged dà te nezing niw ne midtuuwan niw is Meupiya he Tudtulanen.

⁶Iring din ded daan is nehitavù ki Abraham he kepuun tew zengan su zuen insurat he Lalag te Megbevayà he edhenduen te, “Midtuu sikandin te migkagi te Megbevayà ne tenged kayi, is Megbevayà, midawat din si Abraham ne mid-isip din sikandin he metazeng.” ⁷Ne sikiyu zaan, kinahanglan he sevuta niw he iyan ded heini guntaan kayi te kenitew su ke zuen etew he edtuu te Lalag te Megbevayà ne nehimu en sikandin he kevuwazan ni Abraham, *he ke vâ dà egkegiya, egkezawat din is impenaad te Megbevayà diyà te ki Abraham.* ⁸Daan he migkagi is Megbevayà diyà te insurat he lalag din he minsan is menge etew he kenà menge Hudiyu, ne ed-isipen din sikandan he metazeng emun edtuuwan dan sikandin. Impesavut din he zaan ki Abraham is Meupiya he Tudtulanen, ke sikandin te, “Tenged te midtuu ka te migkagi ku, midtuvazan ku sikew. Ne pinaagi zaan kayi te kedtuu nu edtuvazan ku is tivuuk he menusiya dini te kelibutan.” ⁹Ne midtuu si Abraham dutun te Lalag te Megbevayà, ne tenged dutun midtuvazan sikandin te Megbevayà; ne iring din ded daan ke edtuu is minsan hentei te Lalag te Megbevayà, edtuvazan daan sikandin te Megbevayà.

¹⁰Iyan, is minsan hentei mulà he edsarig te kedtumana te kesuguan he imbilinbilin ni Moises, nesugat en te rawak te Megbevayà su zuen insurat he Lalag te Megbevayà he edhenduen te, “Is minsan hentei he kenà din egkepurung egketuman is minsan hengkey he sugù he insurat dutun te kesuguan, ne nesugat en sikandin te rawak te Megbevayà.” ¹¹Ne emun iyan haazà, ne egkesavut ta he wazà minsan hentei he metazeng is ked-isipa kandin te Megbevayà pinaagi te kedtumana te kesuguan su zuen insurat he Lalag te Megbevayà he edhenduen te, “Is minsan hentei he metazeng is ked-isipa kandin te Megbevayà pinaagi te kedtuu

zin te Lalag te Megbevayà, iyan sikandin ebegayan te untung he wazè din pidtemanan,” ke sikandin. ¹²Iyan, ke zuen etew he egkepurung din egketuman is langun he sugù dutun te kesuguan, kenè en kinahanglan he edtuu pa sikandin wey mevegayi te untung he wazè din pidtemanan, su zuen insurat he Lalag te Megbevayà he edhenduen te, “Is etew he egkepurung din egketuman is langun he sugù dutun te kesuguan, ebegayan sikandin te untung he wazè din pidtemanan.”

¹³Minsan pa te nesupak te en is kesuguan, nelibri ki ni Jesus te silut su midrewakan en si Jesus he elili kenitew zutun te kedrensanga kandin te krus, su zuen insurat he Lalag te Megbevayà he edhenduen te, “Ke zuen etew he edhimitayan ne idtaud te impasek he kayu ne tuus heini te rawak kandin te Megbevayà.” ¹⁴Ne umba mibpehimatey si Jesu Kristu te iring dutun su wey pinaagi kandin ikevegey zaan diyà te menge etew he kenà menge Hudiyu is ketazeng he intuvad te Megbevayà ki Abraham. Ne pinaagi zutun sikitew is langun he edtuu ki Jesus, ebegayan kiw zin te Wagas he Mulin-ulin he impenaad dengang te Megbevayà.

Is Saad te Megbevayà wey is Kesuguan

¹⁵Menge suled, duen penenglitan he ibpesavut ku keniyu. Su ke zuen ibpenaad te sevaha he etew he insurat diyà te dukumintu he mibpirmahan din ne mibpirmahan daan te menge tistigus, ne kenà egkehimu he edhelinan wey ed-umanan haazà te minsan hentei su nelig-enan. ¹⁶Ne iring din ded daan su zuen impenaad te Megbevayà diyà te ki Abraham wey ziyà te kevuwazan ni Abraham he egkeuget pa zutun id-anak. Wazè din iyan kegiya he zuen penaad din diyà te menge kevuwazan ni Abraham su kenà mezakel is egkegiyen din, kekenà, ke sikandin diyà te ki Abraham te, “diyà te kevuwazan nu.” Umba migkagi zin heini su sebsevaha zà he etew zutun te kevuwazan ni Abraham is ibpesavut din he iyan si Kristu. ¹⁷Iyan ibpesavut ku kayi is: duen untung he wazè pidtemanan he impenaad te Megbevayà ki Abraham he kenà duwazuwa he edtumanen din su midlig-enan din. Daan en heini is penaad te wazè pa is kesuguan he imbilinbilin ni Moises su neuget pa zutun si Moises su menge heepat pa he gatus wey ketluan he tuig. Ne kenà egkehimu he egkeawà is penaad te Megbevayà pinaagi te kesuguan he imbilinbilin ni Moises. Kenà egkehimu he kenè edtumanen te Megbevayà is penaad din. ¹⁸Si Abraham, imbegey kandin te Megbevayà is untung he wazà pidtemanan tenged dà te impenaad heini kandin te Megbevayà. Iyan, emun egkehimu he ibegey kenita is untung pinaagi te kedtumana ta te kesuguan, kenà daan egkehimu he ibegey heini kenita tenged dà te impenaad heini te Megbevayà.

¹⁹Ne emun iyan heini, ne hengkey is pulus te kesuguan? Ibpesavut ku keniyu is pulus din. In-uman te Megbevayà is kesuguan su wey zin

ipesavut kenita ke hengkey is mezaat he ulaula ta; ne egkesuatan din he zutun dà taman is kedserigi te kesuguan te kebpekeuma te kevuwazan ni Abraham he iyan si Kristu he iyan mibpenaazan te Megbevayà. Midsugù te Megbevayà is minge velinsuguen din he ebpuun diyà te langit wey zan ikevegey is kesuguan diyà te ki Moises. Ne si Moises, nehimu sikandin he zatù te pid-elangan su imbegey zin daan is kesuguan diyà te minge etew. ²⁰Iyan, dutun te kebpenaazi te Megbevayà ki Abraham wazà kinahanglan he zuen datù te pid-elangan su sebsevaha zà dutun is nekepenaad he iyan is Megbevayà.

²¹Ne kunaan niw vuwa ke kenà egkeuyun is kesuguan wey is minge penaad dengan te Megbevayà, iyan, kenà egkehimu he kenà heini egkeuyun. Su ke zuen kesuguan he pinaagi kayi egkevegayan kiw te untung he wazè din pidtemanan ne siguradu egkehimu kiw he metazeng pinaagi zaan kayi te kesuguan. ²²Iyan, impesavut kenitew te insurat he Lalag te Megbevayà he sikitew is tivuuk he menusiyà, sakup kiw en pudu te mezaat he kebayè tew. Ne tenged kayi, wey zà edtumana te Megbevayà is minge penaad din kenita ke edsarig kiw kandin. Wey kiw zà egkevegayi te untung he wazà pidtemanan ke zuen tew kedtuu.

²³Ne te wazè pa ipezayag kenitew he egkekuwa tew is untung pinaagi te kedtuu ki Jesus, iring te nepirisu kiw te kesuguan. Nehimu is kesuguan he iring te guwardya he ebantey kenitew wey kiw kenà mekeawà taman te kenè pa ibpezayag kenitew is paagi he iyan is kedtuuwi ki Jesu Kristu. ²⁴Nehimu zaan is kesuguan he iring te ed-uyamu he iyan ebayàbayà kenitew te iring te minge vatà taman dà te kebpekeuma ni Kristu su wey, ke ebpekeuma si Kristu, meisip kiw te Megbevayà he metazeng pinaagi te kedtuu tew kandin. ²⁵Ne guntaan, te impezayag en kenitew is paagi he iyan is kedtuu, kenè kiw en egkeveyveyaan te kesuguan.

Is Menge Anak te Megbevayà

²⁶Ne geina te iyan haazà, nehimu kew en pudu he minge anak te Megbevayà tenged dà te kedtuu niw ki Jesu Kristu. ²⁷Su midtuuwan niw si Jesu Kristu, ne nebewtismuwan kew he tuus te sumusundan kew zin, ne tenged dutun insun-ud niw si Kristu, *he ke và dà egkegiya, neiringan niw is minge ulaula ni Kristu*. ²⁸Ne tenged dutun kinahanglan he kenè niw isipa he ibpelavi te Megbevayà is minge Hudiyu, ne emun kenà, ne iyan is kenà minge Hudiyu, su ziyà te kandin neked-iiring is langun he minge etew, uripen se kenà uripen, maama se vahi, ne sikiyu zaan, neked-iiring kew ziyà te Megbevayà su neked-iiring kew he edtuu ki Jesu Kristu. ²⁹Ne geina te sakup kew ni Kristu, nehimu kew en he iring te minge kevuwazan ni Abraham ne egkezawat niw zaan is impenaad te Megbevayà ki Abraham.

4 ¹Penenglitan duen anak he minatey is amey zin te vatè pa utew sikandin. Ne minsan pa te sumusunud sikandin te langun he azen

te amey zin he minatey, ne zutun te vatè pa sikandin, iring sikandin te suluguen dà su zuen pa ebayàbayà kandin. ²Duen ed-uyamu kandin he ebantey zaan dutun te minge azen din taman te kenè pa egketuman is timpu he midtelaan te amey zin, ne human sikandin ebpekezawat te kegehèm te kebayàbayà te minge azen din. ³Ne iring kiw zaan dutun su neveyveyaan kiw zengan te minge kenè pa hustu he tuluuwen dini te kelibutan su iring kiw pa te minge vatà is ebantey te langun dutun. ⁴Ne hein netuman en is hustu he timpu he netagnà dengan, is Megbevayà, midsugù din dini te kelibutan is Anak din. Ne heini is Anak din, nehimu he etew pinaagi te ked-enaka kandin te vahi. Ne pinaagi kayi nehimu zaan sikandin he nezizalem te kesuguan he imbilinbilin ni Moises, ⁵su wey kiw zin melibri is langun he zizalem te kesuguan ne wey kiw zaan mehimu he minge anak te Megbevayà.

⁶Ne zutun wey ta metueni he anak ki iyan te Megbevayà, midsugù te Megbevayà he ibpeubpà dini te kenita is Wagas he Mulin-ulin he ziyà te ki Jesus, ne ibpinted din kenita he mekekagi ki te, “Amey ku he Megbevayà.” ⁷Ne guntaan kenè ki en iring te minge suluguen dà, kekenà, anak ki en te Megbevayà. Ne geina te iyan heini, egkezawat ta is minsan hengkey he ibegey zin diyà te anak din.

Is Samuk ni Pablo

⁸Dengan te wazè niw pa tuuwi is tutuu he Megbevayà, neuripen kew te minge edtuuwan he kenà hustu he megbevayà. ⁹Iyan, guntaan te nekilala niw en is Megbevayà iring te kegekilelala zin keniyu, maan is edlikuan niw is wazà pulus he minge tuluuwen he kenà ebpekelibri keniyu te silut? Maan is egkesuatan niw he meuripen kew en maan kayi? ¹⁰Maan is ebenteyanan niw is minge andew, minge vulan, wey minge tuig he ibpetuman te kesuguan he imbilinbilin ni Moises? ¹¹Uteu ku sikiyu igkeipeng su kela ke kenà ebplus is langun he impenurù ku keniyu.

¹²Minge suled, edhengyuan ku sikiyu he ul-ulaha niw is mid-ulaula ku su siak is Hudiyu, mid-engkezan ku en is kedserigi te kesuguan te minge Hudiyu. Nehimu a he iring keniyu zengan te kenà minge Hudiyu. Tutuu iyan he wazà a keniyu meselai, kekenà, mibpurungan a keniyu. ¹³Netuenan niw he umba nehimu is aney ku en kebpenudtuli keniyu te Meupiya he Tudtulanen su nezeruwan a. ¹⁴Ne minsan te zuen ku mezaat he zaru ne wazà a keniyu ikeremerik minsan ke heini is daru ku ne nekesamuk keniyu, iyan, midawat a keniyu iring te velinsuguen te Megbevayà he ebpuun te langit. Impeiring niw is kedewata niw kedì te kedewata niw ki Jesu Kristu. ¹⁵Uteu a zengan keniyu ingkegalew, su ke egkehimu zà ne egkeluten niw is mata niw ne ibegey niw kedì. Iyan e en mismu ebpekekagi kayi mehitenged keniyu. Ne guntaan, maan is nahalin en is gehinawa niw? ¹⁶Maan is egkepeukan a keniyu guntaan?

Kela ke nehimu kew en he kuntada ku tenged dà te migkagi ku keniyu ke hengkey is tutuu he tuluuwen.

¹⁷Haazà is menge etew he kenà tutuu is ibpenurù dan keniyu, ebpurungan kew zan, iyan, kenà meupiya is tuyù dan diyàn te keniyu. Egkesuatan dan he maawà is upakat niw kediey su wey iyan niw zà sikandan mepurungi. ¹⁸Uteu meupiya ke ebpekid-emigu zan keniyu emun kenà mezaat is tuyù dan. Egkesuatan ku he kenà iyan e zà ebpekid-emigu keniyu. Emun kenà a ziyàn, meupiya ke zuen pa ebpekid-emigu keniyu. ¹⁹Henduen be te menge anak ku en sikiyu su minahal ku sikiyu. Iring te edlised is bahi ke ed-anak, egkeregenan a zaan te ked-isipa ku keniyu su egkesuatan ku he megaan niw itugut he iyan ebayàbayà keniyu si Kristu. ²⁰Angin ke ziyàn a te keniyu su wey ku sikiyu melelagi; kenè ku egketuenan ke hengkey is meupiya he idsurat ku he ibpeuwit ku ziyàn su egkeipeng a keniyu.

Is Sempità Mehitenged ki Sara wey ki Hagar

²¹Sikiyu is egkesuat he ebpezizalem te kedtuman te kesuguan, ibpesavut ku keniyu ke hengkey is kehulugan kayi. ²²Su migugud dutun te kesuguan he zuen dezuwa he anak he maama ni Abraham. In-anak haazà is sevaha ni Hagar, kes esawa zin he uripen, ne in-anak haazà is sevaha te esawa zin he kenà uripen he iyan si Sara. ²³Is ked-enaka te anak te vahi he uripen, ne iring ded te ked-enaka te minsan hengkey he vatà, iyan, kes ked-enaka zutun te sevaha he in-anak te vahi he kenà uripen, ne kenà egkehimu emun wazà ipenaad te Megbevayà diyà te ki Abraham. ²⁴Ne sempità heini is dezuwa he vahi. Iyan kehulugan din is dezuwa he paagi he midtukud te Megbevayà te kebpekidsevaha zin te menusiya. Si Hagar is bahi he uripen, ne iyan alung te paagi he imbegey te Megbevayà ki Moises diyà te vuntud he Siney. Iyan heini kes kesuguan. Su is menge anak ni Hagar, *he ke vâ dà egkegiya, is langun he nekesarig te kedtuman te kesuguan, ne menge uripen sikandan.* ²⁵Diyà haazà is buntud he Siney te tanà he egngезanan te Erabya. Ne alung heini is buntud he Siney ki Hagar. Ne iyan kehulugan ni Hagar is inged he Hiruselim su neuripen is langun he meginged dutun *te kedtumana te kesuguan.* ²⁶Ne si Sara, haazà is esawa ni Abraham he kenà uripen, ne iyan kiw alung te kandin he menge anak su kenè kiw menge uripen te kesuguan. ²⁷Su zuen insurat he Lalag te Megbevayà he edhenduen te,

“Sikew is bahi he kenà ed-anak,
lipey ka. Minsan ke wazè ka belilita,
derag-ey ka te kegelipey
su minsan ke mid-ewaan ka te esawa nu,
ed-ulian ke zin ne mezakel is menge kevuwanan nu
kenà te vahi he zuen din esawa.”

²⁸Na, minge suled, iring din ded daan, nehimu kiw en he minge anak te Megbevayà tenged te netuman din is penaad din. Iring heini zuen te ked-enaka ki Isaak ni Sara tenged te netuman is pesarig te Megbevayà diyà te ki Abraham. ²⁹Ne zutun he timpu zengan, haazà is anak ni Abraham he in-anak pinaagi zà te kelibutanen he paagi te kegkevuwad, midhimu zin he meregeni is hazi zin he in-anak pinaagi te tavang te Wagas he Mulin-ulin. Ne iring din guntaan edregregenen kiw te minge etew he neuripen te kedtumana te kesuguan. ³⁰Ne hengkey is sambag te insurat he Lalag te Megbevayà? Duen insurat he lalag din he edhenduen te, “Ipaawè nu is bahi he uripen wey is anak din su is anak te uripen, kenà egkehimu he ebegayan sikandin te minge azen te amey zin. Iyan dà ebpekeangkèn kayi is anak te vahi he kenà uripen.” ³¹Umba, minge suled, sikitew, iring kiw te anak te vahi he kenà uripen, kenè kiw iring te anak te uripen.

Is Kelibriyanan Pinaagi ki Jesu Kristu

5 ¹Pinaagi te kebelukasi kenitew ni Kristu, nelibri kiw en te kedtumana te kesuguan. Umba, kinahanglan he edsukul kiw is mibelukasan su wey kenè kiw en maan meuripen.

²Uteu tutuu heini is egkegiyen ku keniyu he ke iyan niw edserigan is kedsirkunsidara keniyu wey kew meluwas, ne kenè kew egketevangan ni Kristu. ³Ne kenà duen dà taman su tutuu iyan he ke zuen minsan hentei he kunaan din ke ebplus kandin is kebpesirkunsidar, kinahanglan daan he ebpurangan din te edtuman is minsan hengkey he sugù dutun te tivuuk he kesuguan. ⁴Is minsan hentei keniyu he kunaan din ke pinaagi te kedtumana te kesuguan is kebpeketezenga kandin te Megbevayà, nekesuwey en sikandin ki Kristu. Neewaan din en is gagew te Megbevayà kandin. ⁵Iyan, sikami mulà, pinaagi te gehem te Wagas he Mulin-ulin wey tenged te kedtuu zey kandin, iyan ebpeebuten dey is kedhimuwa kenami he metazeng te Megbevayà. ⁶Su emun tumutuu ki en ki Jesu Kristu, neked-iiring kiw en diyà te Megbevayà is nengesirkunsidar wey is wazà mesirkunsidar. Iyan dà duen din pulus diyà te Megbevayà is kedtuu ta kandin he egketuusan heini pinaagi te gagew ta te zuma ta.

⁷Mibpurungan niw zengan te ed-ikul is hustu he ibayà. Maan is idtugut niw he zuen ed-egen keniyu wey niw kenè en metuuwi is tutuu he tuluuwen? ⁸Kenà heini vaal te Megbevayà is kebpekesuwey niw su iyan mid-umbita keniyu wey kew meketuu. ⁹Haazà is tarù he tuluuwen he impenurù keniyu, ne iring te tapey emun ebaal ki te supas su minsan deisek dà is id-amut dutun te zekelà he midhames he erina, egketepayan gihapun is tivuuk he supas. ¹⁰Ne minsan pa zutun, dekelà is kedsarig ku te Nengazen he pinaagi te kedtavang din keniyu, ebpeminegen niw zed is hustu he impenurù ku keniyu. Iyan, haazà is etew he nekesamuk te

isip niw pinaagi te penurù din he tarù, siguradu he edsilutan sikandin te Megbevayà.

¹¹Menge suled, duen egkagi he wazè ku pa engkezi is penurù he kinahanglan he ebpesirkunsidar ki, iyan, emun tutuu heini, maan is kenà a ed-engkezan te ebpesipala te menge zuma ku he Hudiyu? Su emun ibpenurù ku he kinahanglan is kebpesirkunsidar, ne kenè dan egkepauk kediey minsan ke elin ku pa ibpenurù is kebpehimatey ni Jesus he elili kenitew. ¹²Ne sikan is menge etew he edsamuk keniyu pinaagi te tarù he penurù dan, egkesuatan ku pezem he kenà iyan dà is kebpesirkunsidar edtumanen dan, kekenà, elin daan ul-ulaha zan is kebpekapun!

¹³Na, menge suled, tutuu iyan he impetuu ki te Megbevayà wey ki zin melibri ne wazè en kinahanglan he ebpeuripen ki te kesuguan. Ne minsan pa zutun wazè ki melibri su wey iyan mebayàbayà kenita is mezaat he kebaya te lawa ta. Kinahanglan he tenged te zekelà is gagew tew te menge zuma tew ne medtitinevangà is kada sevaha kenitew te menge tumutuu. ¹⁴Is tivuuk he kesuguan he imbilinbilin ni Moises, ne egkepurung egketuman pinaagi te sevaha zà he sugù he iyan heini: “Kinahanglan he purungi nu is duma nu. Isipa nu sikandin he iring te kenikew en he gehinawa.” ¹⁵Iyan, emun iyan niw zà ed-ul-ulahan is kebpepesipelehey wey kebpeeg-egetà, ne egkepurung egkezeeti is upakat niw te menge tumutuu ki Kristu.

Is Mezaat he Suat te Lawa wey is Wagas he Mulin-ulin

¹⁶Iyan heini sugù ku keniyu: pevayàbayè kew te Wagas he Mulin-ulin su emun ed-ul-ulahan niw heini, kenà egkehimu he egketuman niw is mezaat he kebaya te lawa niw. ¹⁷Kenà egkeuyun is mezaat he kebaya te lawa ta wey is egkesuatan te Wagas he Mulin-ulin su telekuntada heini is dezuwa, ne tenged dutun kenè ta layun egkeveelan is meupiya he egkesuatan ta. ¹⁸Iyan, ke ebpesakup ki te Wagas he Mulin-ulin, kenè ki egkesakup te kesuguan he imbilinbilin ni Moises. ¹⁹Egketuusan ta is menge mezaat he ulaula he egkehimu pinaagi te mezaat he kebaya te lawa su iyan is kedhilavet te kenè ta esawa, is meremerik wey mahawag he vaal, ²⁰is ked-ezapa te kenà hustu he ed-ezapan, wey is kegemita te gehem he ibegey ni Setanas. Ebpekigkuntada is menge etew; ebpekidtebek dan; egkesina zan; egkengepauk dan; iyan dà ed-isipen dan is kandan dà he egkesuatan. Ne ed-engkezan dan is kebpekidsevaha zan te menge zuma zan. ²¹Egkeimahan dan is menge azen te menge zuma zan. Egkengelangut dan, ne kenè dan ed-egenen is menge kebaya dan he mezaat, kekenà, edtumanen dan, wey mezakel pa is ed-ul-ulahan dan he iring kayi. Ed-umanan ku te egkagi is migkagi ku he zaan he is etew he ed-ul-ulahan din is menge iring kayi, kenà sikandin ebpekeragkes te egkehedian te Megbevayà keuzemà.

²² Egketuusan ta zaan is menge ulaula he egkehimu pinaagi te gehem te Wagas he Mulin-ulin. Su emun ed-uwiten ki te Wagas he Mulin-ulin, mahal zini te gehinawa ta is menge zuma ta, layun ki egkelipey, melinawen layun is gehinawa ta, mepelevayen ki, beligegawen ki, metulanged ki, metinumanen ki, ²³ kenè ki mevurut, wey egkeegen ta is kebaya te lawa ta. Ne emun iyan heini menge ulaula ta, kenè ta egkesupak is menge sugù kenita te Megbevayà. ²⁴ Ne is minsan hentei he migaked en ni Jesu Kristu, ne iring te inransang din en te krus is mekesesalà he lawa zin, he ke vâ dà egkegiya, mid-engkezan din en is menge mezaat he kebaya din wey egkesuatan din. ²⁵ Ne is Wagas he Mulin-ulin, geina te mibegayan ki zin te vegu en he untung, kinahanglan he ebpevayàbayè ki zaan kandin. ²⁶ Kinahanglan he kenè ki ebpelavew, kenè ki zaan ebpekidtebek te menge zuma he etew, kenè ki zaan egkesina te zuma ta.

Is Kebpetebtevangà

6 ¹ Menge suled, ke zuen duma niw he tumutuu he netuenan niw he nesupak din is Megbevayà, sikiyu is mid-ulinan te Wagas he Mulin-ulin, tevangi niw sikandin su wey zin kenà meengkezi is kedtumana zin te egkesuatan te Megbevayà. Asal, kinahanglan he utew kew mepelevayen is edtavang kandin. Mebpekevantey kew su kela ke mepenulayi kew zaan ni Setanas. ² Layun kew mebpetebtevangà te uman sevaha keniyu su emun ed-ul-ulahan niw heini egketuman niw is insugù kenitew ni Kristu. ³ Ke zuen minsan hentei he kunaan din ke wazà kurang te menge ulaula zin su pudu meupiya, nelimbungan din is gehinawa zin. ⁴ Deyzey ke ebpurangan edsusiya te uman sevaha is menge ulaula zin. Ne emun meupiya, egkehimu he ibmeupiya te gehinawa zin. Iyan, kenè din isukud is menge ulaula te zuma zin te kandin he ulaula. ⁵ Su kinahanglan he bevaa te kada sevaha is kandin he keugelingen he bevaan.

⁶ Ne sikan is etew he ebpepenurù te Lalag te Megbevayà, kinahanglan he vegayi zin is ebpenurù kandin te menge meupiya he nezawat din.

⁷ Kenè kew pelimbung te ulaula niw su kenè ta egkeelesan is Megbevayà te minsan hengkey he ulaula. Is ibpemula te etew, iyan daan egkeragun din. Ne iring din ded daan is menge ulaula te etew, su ed-ahaan heini te Megbevayà ne edsuhulan din is etew keuzemà sumalà is neulaula te uman sevaha. ⁸ Emun edtumanen te etew is kandin he egkesuatan, iyan egkezawat din is kemetayen he wazà pidtemanan. Emun edtumanen din is egkengesuatan te Wagas he Mulin-ulin, ibegey kandin is untung he wazà pidtemanan. ⁹ Umba kenè ki ebpepepegul te ked-ulaula te meupiya su emun ebpeniguduwan ta heini, egkeuma is timpu keuzemà he zuen idsuhul kenita te Megbevayà he utew meupiya. ¹⁰ Ebpurangan ta layun is minsan hentei he etew, lavew en is menge zuma ta he tumutuu ki Kristu.

Is Huziyan he Intelaan ni Pablo

¹¹Kayi te ketepusan te surat he ibpeuwit ku ziyàn, siak si Pablo is midsurat. Egketuusan niw su egkeehè niw he utew zezekelà is kedsurat ku. ¹²Ne sikan is menge etew he egkesuatan dan he mebpsirkunsidar kew, egkesuatan dan he zeliga zan te menge zuma zan. Egkehandek dan te menge zuma zan he Hudiyu su kenè dan egkesuat he pesipelahi sikandan tenged te kedsarig dan te kebpehimatey ni Kristu. ¹³Haazà is menge etew, ne ibpenurù dan he kinahanglan he mebpsirkunsidar kew sumalà is penurù te kesuguan, ne minsan pa zutun kenè dan ebpurangan edtumana is kesuguan. Umba egkesuatan dan he mebpsirkunsidar kew su wey mezalig sikandan tenged te nehimu kew he menge kabig dan. ¹⁴Siak mulà, iyan ku zà ibpezalig is Nengazen tew he si Jesu Kristu he mibpehimatey he elili kenitew. Ne tenged te kebpehimatey zin, wazè e en meuripen te menge kelibutanen he kebaya, ne wazè en kayi gehem te kebayaàbaya kediey. ¹⁵Kenà ebpulus is kebpesirkunsidar ne kenà daan ebpulus is kenà kebpesirkunsidar. Iyan dekelà is pulus dìn is kegehimu kenita he vegu en he linimbag. ¹⁶Is minsan hentei he ed-ikul kayi te ibaya he impenurù ku pinaagi kayi te surat, berakat he mehizuwi te Megbevaya wey vegayi te melinawen he kebpekesavuk, ne kenà iyan dà sikandin, kekenà, elin daan is langun he menge tutuu he tumutuu te Megbevaya.

¹⁷Puun dà guntaan, kinahanglan he wazà minsan hentei he mekgagi he wazà ivegey kediey ni Jesus is kegehem te kebpenurù. Egketuusan kayi te lawa ku is kedtumana ku te menge sugù ni Jesus. Mezakel is menge tulak te menge palì ku he nehimu te menge kuntada ni Jesus.

¹⁸Menge suled, berakat he ikegagew kew is langun te Nengazen tew he si Jesu Kristu. Iyan a si Pablo.